



Pelajar Antarabangsa UPM Juara Deklamasi Puisi NUR FITRI



Pelajar UPM (dua dari kanan Alagie Bah, Ramza Izani Othman dan Ma Shu Ying) bersama replika cek dan piala kejohanan.

NILAI, 15 Okt – Pelajar Antarabangsa Universiti Putra Malaysia (UPM) menjuarai Pertandingan Sanggar Puisi Nur Fitri 1429 Hijrah di Universiti Sains Islam Malaysia (USIM) baru-baru ini.

Tiga pelajar tersebut ialah Alagie Bah dari Gambia, Ma Shu Ying dari China dan Ramza Izani Othman dari Malaysia diiringi irama gambus yang dimainkan oleh Mohd Zulhafis Zulkeply.

Peserta UPM mendeklamasikan sajak bertajuk 'Pagi Yang Syahdu' karya Prof. Madya Dr Lim Swee Tin yang telah dinobatkan sebagai puisi terbaik pada malam itu.

Program julung kali diadakan di USIM itu merupakan satu program yang menggabungkan pelajar tempatan dan pelajar antarabangsa untuk menyampaikan puisi bagi meraikan kedatangan Syawal 1429 Hijrah.

Pertandingan itu disertai lima kumpulan daripada empat buah universiti iaitu UPM, USIM yang mendapat tempat kedua, UPM, INTI College tempat ketiga dan Universiti Kebangsaan Malaysia.

Peserta UPM membawa pulang RM500 dan trofi sementara bagi hadiah puisi terbaik RM250.

Pertandingan tersebut menggabungkan persembahan seni vokal puisi, syair dan nazam.

Timbalan Naib Canselor Hal Ehwal Pelajar dan Alumni (HEPA) UPM, Prof. Dr. Azali Mohamed berkata pertandingan itu telah memberikan peluang kepada pelajar supaya menggunakan bakat seni serta memberi peluang kepada pelajar antarabangsa untuk mendekati diri dalam komuniti kampus.

Barisan juri yang mengadili pertandingan pada malam itu terdiri daripada penyanyi lagu puisi Siso, penyair Syukri Abdullah dan Rahimidin Zahari.

Turut hadir pada malam itu ialah Pengerusi Lembaga Pengarah USIM, Tan Sri Dr. Mohamad Yusof Mohd Noor, Timbalan Naib Canselor (HEPA) USIM, Prof Dato Dr. Mohamed Asin Dollah dan juga Pengerusi FINAS, Senator Tan Sri Datuk Jins Shamsudin.

Oleh: Siti Arbayah Joseph
(suntingan Unit Media, Bahagian Komunikasi Korporat, UPM.)